

O Dujto Poslanie džiko Timotej

Pozdrav

1 ¹ O Pavle, apostoli e Hrista Isuseskoro pali Devleskiri vojlla, spored o vetimo životu ko Hristos Isus, ² džiko Timotej, o manglo čedo, o blagodat, milost, hem mir taro Devel o Dat hem o Hristos Isus, amaro Gospodari.

Te thabljakjere e Devleskoro dari

³ Blagodarinava e Devleske Kaske služinava panda taro mle praroditejlja čisto sovesteja, spomninavatut stalno – i rat hem dive – ko mle molitve; ⁴ a koga ka spomninav baši tle asva, sijum but žedno te dikhavtut, te phergjovav radosteja, ⁵ koga spomnina mangle baši nelicemerno vera koja tani ki tute, koja prvo arakhljagjovela sine ki tli baba i Loida hem ki ti daj i Evnika, a uverimo sijum hem ki tute.

⁶ Odoleske, potsetinavatut te thabljakjere e Devleskoro dari, koj tano ki tute preku so čhigjum mle vasta. ⁷ Soske o Devel na dengjamen duho darakoro, nego duho silakoro, mangipe, hem samokontrola.

Ma ladža taro svedošтво

⁸ Hem agjar, ma ladža taro svedošтво baši amaro Gospodari hem mandar, o zatvorniko baši Leske, nego cide hem tuda mancar baši o Evangelie, spored i sila e Devleskiri, ⁹ Koj spasingjamen hem povikujngjamen sveto vikibaja, na spored amare dejlja nego pali Pli sopstveno odluka hem blagodat, koja amenge dendi ko Hristos Isus angleder o večna vremia, ¹⁰ a koja akana otkringjapes preku o javibe amare Spasiteleskoro o Hristos Isus, Koj uništingja o meriba hem osvetlingja o životu hem o bizomeriba preku o Evangelie, ¹¹ baši kova me sijum postavimo sar propovedniko, hem apostoli, hem učiteli.

¹² Baši odova hem trpinavale sa akava, ama na ladžava, soske džanava ki Kaste poverujngjum hem uverimo sijum deka Ov šaj te zapazinel okova so doveringjum Leske, džiko odova Dive.

Zapazin o šukar soj tuke doverimo

¹³ Neka oventut, sar primer, o saste lafia so šungjanlen mandar, veraja hem mangipaja ko Hristos Isus. ¹⁴ Zapazin o šukar soj tuke tano doverimo preku Sveti Duh, Koj živinela ki amende.

¹⁵ Tu džaneja odova, deka ki Azija sa cidingepe mandar, maškar koj tane o Figel hem o Ermogen.

¹⁶ O Gospodari te del milost ko Onisoforeske ko kher, soske poviše puti ohrabrinelaman sine hem na ladžandilo taro mlo phanlipa, ¹⁷ nego, koga alo ko Rim, uporno rodingjama hem arakhljama.

¹⁸ O Gospodari te dele te arakhel milost anglo Gospodari ko odova Dive! Hem sar sa uslužingjama ko Efes, tu najšukar džaneja odova.

Podnesin sar šukar vojniko

2 ¹ Hem agjar, tu mo čedo, zajaknin ki blagodat, koja tani ko Hristos Isus! ² Hem so šungjan mandar, anglo but svedokja, doverinle ko poverliva manuša, koj ka oven sposobna te poučinen hem javeren!

³ Podnesin mancar o cidiba, sar šukar vojniko e Hrista Isuseskoro! ⁴ Nikoj, koj tano ki voeno služba, na zapletkinelapes ko bukja akale životoskere, za da te ugodinel okoleske so povikujngjale ki vojska. ⁵ Isto agjar, ako nekoj natprevarinelape, na dobinela venco ako na natprevarinelape propisno. ⁶ O Zemjodelco koj trudinelapes trebela prvo te probinel taro plodia. ⁷ Hajljev so vakjerava, o Gospodari ka deltut te hajlbove sa.

⁸ Spomnin e Isuse Hristo, Koj voskresningja taro mule, Koj tano taro e Davideskoro potomstvo, spored mlo Evangelie, ⁹ baši kova cidava sa džiko phanlipa, sar disavo bilačo manuš. Ama e Devleskoro slovo nae tano phanlo. ¹⁰ Baši odova izdržinava sa baši o izbirime, ta hem olada te dobinen spasenie e večno slavaja ko Hristos Isus.

¹¹ Verodostojno tano o slovo: „Ako mulem Oleja, Olejada hem ka živina; ¹² ako trpinaja Oleja, hem ka carujna; ako odrečinajamen Olestar, hem Ov ka odrečinelpes amendar; ¹³ ako sijem neverna, Ov ačhola verno! Soske Korkori Pes našti te odrečinel.“

Naš taro ternikane želbe

¹⁴ Akava potsetinle, zadolžinlen anglo Devel, tena prepirinenpe baši o lafia, odova nae tano korisno, nego tano baši propast okola so šunena.

¹⁵ Trudintut pažljivo, za da te sikavetut tut dostojno anglo Devel sar rabotniko, koj na trebela te ladžal, koj pravilno propovedinela o slovo e čačipaskoro!

¹⁶ A cidetut taro nečista hem čuče lafia, soske asavke sa poviše ka džan anglal ko bizodevlipa. ¹⁷ A lengoro slovo širinelape sar rako; taro koj tane o Imenej hem o Filet, ¹⁸ koj cidingepe dur taro čačipe, tvrdinena deka o voskresenie vekje ulo hem odoleja rušinena i vera nekaskiri.

¹⁹ Sepak cvrsto bešela e Devleskiri osnova, koja isila akava pečati: „O Gospodari pendžarela koj tane Leskere“ hem „Te cidelpe tari nepravda sekoj, koj spomninela e Gospodareskoro anav.“

²⁰ A ko baro kher isi na samo zlatna hem srebrena čare nego hem kašteskere hem phuvjakere. Jek tane baši svečeno upotreba, a javera baši sekova dive te upotrebinen. ²¹ Hem agjar, ako nekoj očistingjapes taro akala, ka ovel čaro baši svečeno upotreba, osvetimo, korisno e domakineske hem spremimo baši sekova šukar delo.

²² Naš taro ternikane želbe! Dža pali pravda, vera, mangipe hem mir okolencar koj povikujnena e Gospodare taro čisto srce.

²³ Frdelen o glupava hem bizogogjakere pučiba, džandipaja deka bijanena borbe.

²⁴ A e Gospodareskoro sluga na smejnela te rasprajnelpes, nego trebela te ovel krotko ko sarine, sposobno te poučinel hem te trpinel; ²⁵ te vospitinenlen so krotost okola koj protivinenapes, ta nebi li delalen o Devel pokajanie, baši pherdo pendžariba e čačipaskoro, ²⁶ za da te otrezinenpes tari mreža e bengeskiri, koj zarobingjalen za da te ispolninen oleskiri vojlja.

Ka oven phare vremia

3 ¹ A akava džan: ko posledna dive ka oven phare vremia, ² soske o manuša ka oven sebična, srebroljubitejlja, korkori te falinenpe, gordeliva, hulitejlja; nepokorna e roditelenge, neblagodarna, bizo svetost; ³ bizo prirodno mangipe, na mangena te smirinenpe, lena ki men, naelen kontrola, diva, dušmajna e šukaripaske, ⁴ predavnikja, izbuvliva, vazdime, poviše dikhena te uživinen ke ple

strastia, a na te mangel e Devle, ⁵ koj isilen izgled devlikano, a odrekujngepe tari oleskiri sila; cidetut hem olendar!

⁶ Soske olendar tane okola koj čivenapes ko khera hem hovavena e prosta džuvlen natovarime grevoncar, koj tane vodime taro različna strastia, ⁷ koj sikljovena sekogaš, a nikogaš našti te aven ciko pendžaribe o čačipe.

⁸ Hem sar so o Janij hem o Jamvrij sprotivstavingepes e Mojseske, agjar hem akala protivinenapes e čačipaske, manuša irame gogjaja, prepele tari vera. ⁹ Ama nae te napredujnen vekje, soske olengoro delinipa ka otkrinelpes anglo sarine, sar so otkringjapes hem okole dujengoro.

Ačhov ko odova so sikliljanle

¹⁰ A tu sledineja sine mlo učenje, o način e živibaskoro, i zamisla, i vera, o dolgotrpenie, o mangipe, o trpenie, ¹¹ o goniba, o cidiba so slučingepes mange ki Antiohija, Ikonija hem Listra. Save progonstvia pretrpingjum, hem o Gospodari izbavingjaman taro sa! ¹² A hem sarine koj mangena te živinen devlikano ko Hristos Isus, ka oven progonime, ¹³ džikote o bilačhe manuša hem o izmamnikja ka napredinen ko bilačhipe, te hovaven hem ka oven hovavde.

¹⁴ A tu ačhov ko odova so sikliljanle hem ko so sijan ubedimo, soske džaneja kastar sikliljanle hem ¹⁵ soske taro tlo tiknipa pendžareja o Sveta Pismia, koj šaj te kjerentut mudro baši spasenie preku i vera ko Hristos Isus. ¹⁶ Celo Sveto Pismo tano taro Devel vdahnujmo hem tano korisno baši sikljojba, baši te hajljova kote amare greške, baši popraviba hem baši vospitiba ki pravda, ¹⁷ za da te ovel e Devleskoro manuš sovršeno spremimo baši sekova šukar delo.

Propovedin o Slovo

4 ¹ Zadolžinavatut anglo Devel hem o Hristos Isus, Koj tano gotovo te sudinel e dživdenge hem e mulenge, Oleskere javibaja hem Oleskere carstvoja; ² propovedin o slovo, nastojn ko vreme hem ko nevreme, vakjer kote grešinena, vikin lenge, ohrabrin sa te strpleneja hem sikljojbaja.

³ Soske ka avel vreme, koga o manuša na ka trpinen i sasti nauka, nego spored ple strastia ka kheden peske učitejlja, baši te ovel olengere kanenge šukar, ⁴ hem ka iranen ple kana taro čačipe, a ka iranenpes ko paramisa.

⁵ A tu ov trezveno ko sa, trpin o cidibe, izvršin i buti evangelisti, ispolnin tli služba džiko krajo. ⁶ Soske me vekje čhorgjovava sar žrtva, hem o vreme mle džajbaskoro alo. ⁷ Margjuma šukar borba, završingjum o prastajbe, zapazingjum i vera. ⁸ Otakana poadari spremimoy tano mo venco e pravdakoro, so ka dele mange ko odova Dive o Gospodari, o Pravedno Sudija, hem na samo mange, nego hem sarinenge, koj zamangle Oleskoro javiba.

O Gospodari dengjaman sila

⁹ Pogrižintut te ave skoro ki mande, ¹⁰ soske o Dimas mukljama, soske zamanglja o avdisutno sveto hem gelo ko Solun; o Kriskent gelo ki Galatija, o Tit ki Dalmacija. ¹¹ Samo o Luka tano uza mande. Le e Marko hem anale tuja, soske mange tano korisno baši služba. ¹² E Tihike bičhagjumle ko Efes. ¹³ Koga ka ave, ana i nametka, so mukljumla ki Troada uzi karpa, hem o lila osobeno o pergamentia!

¹⁴ O Kovači o Aleksandar kjergja mange but bilačhipe; o Gospodari ka platinel leske spored oleskere dejlja. ¹⁵ Hem tuda pazintut olestar, soske protivisalilo but baši amare lafia.

¹⁶ Ki mri prvo odbrana nikoj na sine mancar, nego sarine muklema; neka mate računinelpes lenge odova! ¹⁷ Ama o Gospodari ačhilo mancar, hem dengjaman sila, za da te ispolninelpes o propovediba preku mande, hem te šunen sa o narodia; hem izbavingjuma taro e laveskoro muj. ¹⁸ O Gospodari ka izbavinelma taro sekova bilačo delo hem ka zapazinelma baši Plo nebesno carstvo. Oleske slava baši večna vejkja. Amin!

¹⁹ Pozdravin e Priskila hem e Akila hem Onisiforeskoro kher! ²⁰ O Erast ačhilo ko Korint, a o Trofim mukljumle nasvalo ko Milet. ²¹ Pogrižintut te ave angleder o jeven! Pozdravinenatut o Euvul, o Pud, o Lin, i Klaudija, hem sa o phrajlja.

²² O Gospodari o Isus Hristos te ovel tle duhoja! I blagodat te ovel tumencar. Amin!